

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma’n CM protocol in a ken tel venhimna bak doctor leh magistrate a inzui tir ngai loh thu a sawi a, an sawrkar ah a hautak lo thei ang berin an kal tih a sawi.
- 2. Mizorama Health ATM hmasa ber Civil Hospital Lunglei leh Primary Health Centre (PHC) Lungsena khawl bun thar chu vawiin khan Health Minister Pi Lalrinpuii'n a hawng.
- 3. Lai Autonomous District Council, Chief Executive Member atan M.Kawnpui bialtu Pu N.Zangura chu vawiin khan Additional DC Lawngtlai Pu David Lalrinawma'n rinawmna thu tiamtirin a la lut.
- 4. Ruahsur nasain Jammu & Kashmir a tibuai buai zui zel.

<><><>

PARTY POL SESSION

Chief Minister Pu Lalduhoma’n CM protocol in a ken tel venhimna bak doctor leh magistrate bakah Ambulance an inzui tir ngai loh thu a sawi a, an sawrkar ah a hautak lo thei ang berin an kal tih a sawi.

Vawiina ZPM party pisaa chhung inkhawm a hmanpui na ah he thu hi sawiin Pu Lalduhoma chuan Spare car englai pawha ken ngei ngei tur anih lain Aizawl pawna zin anih loh chuan ken ani ngai lo a ti a, Doctor leh Magistrate bakah Ambulance pawh a inzui tir ngailoh thu sawiin District tina police in an hmuah thin pawh an ti tawp vek a ti a, a kaihhruai sawrkar chu a hautak lo thei ang berin an kal tih a sawi.

Byte : Chief Minister

Pu Lalduhoma chuan kalphung tharah party hrang hrang a tha zawngin inel se ramin hma a sawn phah dawn a ti a, eptu party te chuan kum tam tak chhunga an tih theihloh hun reilote chhunga ti vek tura an phut thu sawiin mipuiah an tih theih tur sawi ve se a duh thu a sawi a, in sel ngawt lova eptu te nen inelna thianghlim a awm chuan ramin hma a sawn phah dawn tih a sawi.

Hetihlai hian vawiina MNF chhung inkhawmah chuan Party President Pu Zoramthanga chuan MNF sawrkar laia an sulhnu chu sawinep theih a ni lo a ti a, sipai ramluah chhuhsak a, MINECO an din leh Lunglei World Bank road ringawt pawh a nep loh zia mipuiin an hria a ti a, Peace bonus an sawi chhuah pawh Mizoram budget zatve thuak anih thu sawiin MNF Sawrkar laia hmasawnna hna an thawh nasatzia hretu chu zoram mipuite an ni tih a sawi.

BJP chhung inkhawmah chuan State Vice President Pu Vanupa Zathang chuan Indian Foreign Policy chu ropui tak, thenawm ram te thian thaa siam zel ani a ti a, Sawrkar laipui thlazar hnuaiah Mizoram pawhin hma a sawn zel thu a sawi bawk.

<><><>

MZP SIT-IN PROTEST

Vawiin khan North East Students Organisation huaihawtin, MZP General Headquarters chuan, Vanapa Hall kawt-ah hmarchhak biala ramdang mi an duhhlohna tarlangin an pungkawm.

MZP huaihawt "Sit-in Protest against illegal immigration in North East States" hi hmarchhak state dang ruala neih niin MZP President Pu H. Lalthianghlima chuan hmarchhak state ah ramdang mi Bangladesh atanga lokal an tam avangin buaina hrang hrang a awm phah a ti a, Assam chu buai ber anni tih sawiin Mizoram pawh harh thar an tul hle tih sawiin Sawrkar chuan ruahmanna khauh tak siamin ramri venghim se an duh tih a sawi.

NESO Coordinator H. Hrankunga chuan vawiina an punkhawm chhan chu hmarchhak bialah dan loa ramdang mi pem lut te dang tura sawrkar nasa taka an nawrna in awmzia a neihloh avanga pungkawm an nih thu sawiin Dan lova ram chhunga rawn pem lutte chu hmun dangah sawn kual mai mai an nih lohna turin thenawm State-te leh a kaihhnawih Agency-te nena thawhhona tha neih an duh thu a sawi bawk.

Byte : NESO Coordinator H. Hrankunga

India hmarchhak state hrang hranga Zirlai Pawlte chuan an State Chief Minister-te hnenah theuh Memorandum thelut bawkin, chu an memorandum-a an thu tarlan zingah chuan dan lo va pem lutte hriatchhuah thuai leh ram danga thawh chhuah theihna tura hmalakna khauh tak kalpui tur te, Indo-Bangla ramri khar tur te, A ram leilung fate dikna, hnam ziarang leh nunphung, tawng, Politics leh ram neitu an nihna humhalh leh venhim ni rawh se tihte a tel a ni.

<><><>

HEALTH ATM

Mizorama Health ATM hmasa ber Civil Hospital Lunglei leh Primary Health Centre (PHC) Lungsena khawl bun thar chu vawiin khan Health Minister Pi Lalrinpuii'n a hawng.

Lunglei District Administration hma lakna, "Healthy Lunglei Initiative" hnuaia khawl bun thar a hawnna ah Health Minister Pi Lalrinpuii chuan Healthy

Lunglei District Campaign hnuai^{ah} natna inkai chhawn theih loh endikna leh a chungchang inzirtirna ngawrh taka kalpui a nih thu leh mipui vantlang thawhpuina azara hriselna lama than harhna leh hmasawnna hmuh zel a nih thu sawiin, tuna Health ATM hawn a ni leh ta chu an hma lakna hlawhtlinna belhchhahtu a nih thu a sawi.

Minister chuan Health ATM chu mipuite'n rang taka mahni hriselna dinhmun — BP, zunthlum, taksa inphut dan, taksa boruak thianghlim oxygen awm zat, leh thil dang tam tak hriat nan a hman theih dawn tiin, a hmangtute hriselna dinhmun chu lo chhinchhiahin, digital health record a vawng tha nghal zel dawn a, inentir tura damdawi in lian zawk pan nana sum, hun leh tha tam tak sen ngai thin chu eng emaw chen a chhawk zangkhai thei dawn a ni, a ti.

Byte : Health Minister

Health ATM-ah hian test chi hrang hrang 35 vel tih theihin, taksa nihphung tlangpui, zunthlum, thisensang, lung lam, beng, mit leh rilru lam dinhmun te a endik theih dawn a. Hriselna atana ei leh in fimkhur dan tur thurawn te pawh a awm bawk a. Test hrang hrang hi a thlawn veka tih theih niin, darkar chanve tling lova tih zawh vek theih a nih bakah, test result hi mahni phone-ah a dawn nghal theih bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LADC NEW CEM

Lai Autonomous District Council, Chief Executive Member atan M.Kawnpui bialtu Pu N.Zangura chu vawiin khan Additional DC Lawngtlai Pu David Lalrinawma'n rinawmna thu tiamtirin a la lut.

Byte : Oath taking Pu N. Zangura

CEM laklurna inkhawm, LADC a Exeutive Secretary Pu K.Lalthanzara kaihhruaiah hian CEM thar Pu N.Zangura chuan LADC Term 11-na ah hun harsa tak tak an tawk tih sawiin, hun pawimawh ah ram hruai hna thawk tura a chung mawhphurhna tla chu lawmawm a tih rualin amah chauh chuan hma chhawn ngaihna a awmlo a ti a, LADC member, hnathawktute, Kohhran leh khawtlang hruaitute leh ram mipuite thawhpuiah sawmin, LADC tan ngaihtuahna sengthar tur leh engkimah finchhuah thin turin a sawm a ni.

United Democratic Alliance hruaitu Pu N.Zangura hian a chan pual bak engmah a beisei loh tur thu sawiin, pawisa chu dik taka hman a nih chuan ram mipuiten engemaw zawng talin an tangkaipui ngei a beisei thu a sawi a, LADC

hnuaia thawkte leh a Sorkara a thawhpuite pawh sum thianghlimlo laka inthiarfihlim ngam turin a a chah a ni.

Pu N. Zangura hian a thawhpui tur Executive member pakua chu vawiin khan a ruat nghal a, LADC ah hian MDC 25 awmin tun dinhmunah UDA ah hian MNF MDC 11 leh BJP MDC pahnih an awm bakah pawn lam atangin Congress MDC neih chhunin a tlawp a, an vaiin member 14 an nei a, ZPM in MDC 11 an nei thung a ni.

<><><>

CM

Chief Minister Pu Lalduhoma hovin vawiin khan a pisaah Aizawl Sustainable Urban Transport Project (ASUTP), Project Readiness chungchang sawiho a ni.

He hunah hian UD & PA Minister Pu K. Sapdanga leh sawrkar mi pawimawhte telin, Pu K. Sapdanga chuan Aizawl khawpui zau chho zel mila khawpui chhung inkalpawhna tur ruahmanna an siam dan a tarlang a, a senso chu Asian Development Bank loan tinzawn niin, state sorkar tana hautak lutuk lo tura duan a nih thu a sawi.

UD&PA Secretary Pu Lalmalsawma Pachuau chuan ruahmanna an siam tlangpuite a tarlan ah Lengpui Airport huamin, Aizawl tlak lama mihring chenna zauh thla zel tura ngaih niin Muallungthu atanga Sihphir huama khawpui inkalpawhna an ruahman te, Kulikawn leh Bawngkawn inkar kawng leh inpawhna tihhmasawna te, Temple atanga Vaivakawn kawngpui leh a chhehvel tihhmasawn leh junction siam that te, Aizawl tawntirh hmun pathuma Truck, Bus leh Maxi Cab terminal lian siam te, kawngpui thlan bik pahniha EV Bus tlantir a, chung bus te chawmtu tur EV feeder Bus khawpui chhung kawng thlan bika tlantir te a tel a ni.

<><><>

J&K RAIN HAVOC

Ruahsur nasa vangin Jammu & Kashmir-ah khawsak phung a la buai zui zel a, hmun tam takah leiminin kawng a hnawh pin bakah kawlphehta supply pawh a khaihlak nasa hle a, vawiin khan zirna in zawng zawng khar a ni.

Ruah hi naktukah pawh a la sur chhunzawm thei tih Met Dept chuan sawiin sabereka khuangkaih, lei min leh lei tawlh a thlen theih avangin mitin fimkhur turin a ngen a ni.

Hetih lai hian Himachal Pradesh pawh ruahsurin a la tibuai zui zel a, State Emergency Operation Center sawi danin, national highway 2 telin kawngpui 313 chu lirthei tan khar a ni a, tun fur ruah sur kaihnawihna chhiatna hrang hrang thlengah mi 261 an thih tawh bakah midang 37, chin hriat lohvin an la awm mek a ni.

<><><>